



Ang Kalihukan

National Democratic Front - Amihanang Sentral Mindanao

Tuig 28 | Gula 2 | Ispesyal nga Isyu | Abril 24, 2021

Makigbisog ug wagtangan ang tanang kahadlok!

Mensahe sa ika-48 nga anibersaryo sa National Democratic Front of the Philippines

*Ka Cesar Renerio
Tigpamaba
NDF-NCMR*

Tibuok kusog nga nakighiusa ang NDF - North Central Mindanao Region sa tanang katawhan sa pagsaulog karong adlaw sa ika-48 nga anibersaryo sa National Democratic Front of the Philippines.

Atol sa maong pagsaulog, atong ihatag ang pinakataas nga pagsaludo sa tanang rebolusyonaryong pwersa - sa mga kadre ug membro sa Partido Komunista sa Pilipinas, sa mga Pulang kumander ug manggugubat sa Bagong Hukbong Bayan ug sa tanang membro sa mga organisasyong masa, ug sa tanang katawhan nga maisugong nakiglimbasog taliwala sa pasismo ug tiranya sa estado ug mapadayunong mipaasdang sa gubat sa katawhan.

Kanunay paborable ang kahimtang karon alang sa labaw pa'ng pagsulbong sa rebolusyonaryong kusog sa katawhan. Busa, angayan lamang nga mosukol ug makigbisog kita ug wagtangan ang unsamang kahadlok aron makaangkon kita og mas daghan pa'ng kadaugan.

Makigbisog kita aron ibutyag ug ikundena

ang langay, dili-seryoso ug pabor-sa-ginasya nga pag-atubang sa rehimeng US-Duterte sa krisis sa pandemyang Covid-19. Angayang subli-subli natong iduso ang maki-katawhan, kaylap, libre ug paspas nga pagbakuna aron maluwas ang katawhan gikan sa pandemya. Kadungan niini, angayan usab natong ibutyag ang gahaman nga mga imperyalistang nasud, ilabina ang US ug China, sa ilang pagpahimulos sa pandemya alang sa ilang laraw sa ekonomikanhon ug pulitikanhong interes sa mga atrasadong nasud, lakip na ang Pilipinas.

Makigbisog kita ug atong suklan ang daw irong buang nga teror nga paghari ni Duterte. Niining tuiga lang, nasinati nato sa rehiyon ang mas gipasubsob ug mas gipabangis nga pagpangatake ug pagpamuntog sa mga yanong sibilyan. Sa kabukiran, dili ginatugutan sa mga berdugong sundalo

sa AFP ang mga masang mag-uuma nga magtikad sa hilit nga lugar o, kung ginatugutan man, limitado ang oras sa pagtikad. Ginahasi ug ginapasanginlan gilayon nga mga tigsuporta sa NPA ang mga yanong nanginabuhi, bisan sa mga bakilid nga uma. Luyo niini nga paglisud-lisod ug grabeng pagpagutom, wala usay ginahatag nga suporta ang gobyerno aron makakaon ang mga mag-uuma. Samtang, sa kasyudaran, mas nikaylap usab ang kawalay-trabaho ug kagutom. Sa susamang higayon, mas nikaylap usab ang pagpamatay, pagpasaka og mga tinumu-tumong kaso ug iligal nga pagpangdakop sa mga inosente. Angayang patigbabawan nato ang atong kahadlok sa mga pwersa sa estado ug atong ipakita ang atong kusog diha sa atong lig-on nga paghugpong.

Makigbisog usab kita ug atong ikundena ang padayong pagbuyangyang ni Duterte sa ekonomiya sa Pilipinas taliwala sa makamatay nga kahimtang sa katawhan. Mas gihatagan og prayoridad sa estado ang pagsulod sa mga langyaw'ng negosyo sa nasud, pag-import sa mga batakang palaliton sama sa bugas (pinaagi sa Rice Tariffication Law) ug karneng baboy ug paghatag og kagawasan ug benipisyo sa mga dagkong burgesya kumprador samtang nagkagrabe ang pagkalugi ug pagkabangkarote sa mga gagmay'ng negosyante ug kagutom ug kawalay-trabaho sa dakong ihap sa masang Pilipino.

Makigbisog usab kita alang sa atong nasudnong soberanya. Niining bag-uhay lamang, ginapakita ni Duterte nga isog lamang siya sa istorya ug ngadto sa mga yanong sibilyan apan diay talawan sa langyaw'ng gahum ug walay-takus aron depensahan ang kaugalingong nasud. Taliwala sa pagkamakatarungan nga iya sa Pilipinas ang West Philippine Sea, walay pagduha-duha gihapon kining gitugyan ni Duterte ngadto sa China. Gitugutan lamang niini ang 220 ka barko sa China nga magistasyon sa Julian Felipe Reef sa Spratly Islands. Wala kita nanginahanglan og itoy nga presidente nga andam mobaligya sa soberanya sa atong nasud. Busa, ang katawhan lamang ang adunay katakus sa pagpanghingusog ug pagpanalipod sa nasudnong kagawasan.

Labaw sa tanan, angayang makigbisog kita ug dili mahadlok tungod kay paborable karon ang kahimtang alang sa pagpadaog sa atong gubat sa katawhan. Balik tun-an nato ang tabunok nga kasaysayan sa pagsukol sa katawhan ug atong subling pamatud-an nga ang atong pagsukol ang yawe sa atong kalingkawasan ug pagkab-ot sa patas ug sosyalistang katilingban.

MAKIGBISOG, DI MAHADLOK!

**MABUHI ANG IKA-48 NGA ANIBERSARYO
SA NDFP!**

MABUHI ANG KATAWHANG NAKIGBISOG!

**IBAGSAK ANG REHIMENG
US-DUTERTE!**

**IASDANG ANG GUBAT SA KATAWHAN
HANGTUD SA KADAUGAN!**